

A miasöhlig's, a sches, a vois Leb'm

Meiner Mutter zum 90er

's wor net g'rod' a guide Zeit,
wia unsa Muida is gebor'n:
Ollas neich, a Republik,
da Kaisa hot in Kria valor'n,
und aus da groß'n Monarchie
hob'm's a gonz kloas Landl g'mocht.
Vü z'kloa' is's g'west, zum Iwaleb'm;
so hot ma domois des betrocht't.

A Somsto wor's in Schleez do drent –
a newliga Novembato –
do wor mit Schroa und Plärrarei
de Schwinner Miez auf oamoi do!
De Muida hot gonz söli g'lucht,
da Voda rennt zum Pforra glei:
Endli a Mensch no de zwee Buim,
do is vü Donk und Freid' dabei!

Da Voda wor da Oberlehra
in da Klass' im Schuihaus zeem,
gor streng wor a – mi'n Staberl gor –
do hot's nia koan Muxa 'g'eb'm!
Des host net mit'kriagt, woast no z'kloa.
Renna host g'leent und red'n a
bist g'hängt on da Ki'lfoit'n,
und woast da Liabling vo Mama!

Du kost net rechna, kost net schreib'm
und boid bist – schnö geht's – scho sechs Johr.
Des ko ma do net onsteh' loss'n,
do hoaßt's in d'Schui' geh', des is klor!
Scho sitzt mit d'onern Tafalklassla
beim Oberlehra in da Klass'.
Der vosteht – g'rod' weu 's da Voda –
beim Rechna, Les'n gor koan G'spass.

Hintan Kraft-Stodl, durt om Ocka,
steht a schena Äpföbam.
Do bist amoi mit d'Frendinna
auffekreut, ma glaubat's kam.
De rot'n Äpfö hob'm eng g'lockt
und a poor hob't's eeg'steckt g'schwind.
Owa g'rod' in dem Moment,
da Ferdlong'l g'rennt scho kimmt!

„G'frasta!“ schreit a, „meene Äpfö!
Wort's nur! Es! I 'kriag eng scho!“
Olle Kina san daschrocka,
g'schwind vom Bam und glei davo.
Owa du, mi'n Boachatkload'l
bis hänga 'blieb'm ob'm auf an Ost,
an Riss hot's g'mocht, du liegst om Kreiz,
ko'st di' net rier'n, an Schock du host.

Da Ferdlong'l is glei do,
siacht di lieg'n, vogisst seen Grimm.
Du bist stumm, koan Ton ko'st red'n,
da Ong'l trest' di' „s is net schlimm!“
und trogt di hoam zu deene Muida,
's Kloadl hi, des wird nix mehr.
Und dir is in Kreiz wos 'blieb'm –
a wenig'l schief gehst heet daher.

Dass söchtane Charaktafeula
dir net bleib'm fir's gonze Leb'm,
hot di' dee Vota donn noch Retz
fir d' Hauptschuizeit ins Klosta 'geb'm.
Wos di' druckt zu dera Zeit –
's Hoamweh wor da kleanste Schmerz, –
dee liabe Miuda, long scho kronk,
is domois g'storbm, des schneid't ins Herz.

Mit vü Load und recht wen'g Freid'
is so de Hauptschuizeit vogonga.
Donn schickt da Voda di' in d'Kochschui',
dass d'durt wos leenst, muiß er volonga!
Mehr g'leg'n wa da de Hond'lsschui',
owa da Voda hot's beschloss'n.
Do hot's koa Mucka 'geb'm koa bed'ln,
san hoamli a de Zachan g'floss'n.

In Maissau host du ollas gleent,
wos kinna muiß a brave Frau:
Kocha, Bocha, Nah'n und Stricka –
Auf des schau'n de Monna g'nau!
Und donn host do' **deen** Schäd'l durchg'setzt,
z' Horn woast in da Hond'lsschui'.
Auf „Bürofräul'n“ host iatzt g'leent,
in Kopf, den host scho g'hobt dazui.

Leida wor wieda Kria und d'Lehra
bei da Wehrmocht, on da Front.
So 'kriag'st du a Schreibmaschin'

äußerst söt'n nur in d'Hond!
Und wos d'donn om erscht'n Posten
bei an kumoten Rechtsonwoit,
Popier vobraucht host, wen'g da Feuler,
hätt' eam in Konkurs 'trieb'n boid!

D'rum hot er di' – zu beida Nutz'n –
zur Finanz rekommandiert.
Und wirkli hob'm's di' durt glei g'nomma.
D'Mitzi a Beomtin wird!
Und bis zum Kriagsend' woast in Horn,
du om Finanzomt flott und g'schickt.
Und erschte zorte Frontpostbriafal
host on an Oberlehra g'schickt.

Auf oamoi wor ollas onascht:
Finfavierz'g wor z'End' da Kria.
Ongst vor d'Russ'n iwaroi.
Du woast in Plott, host net g'wisst wia
des Leb'm iatzt weida geht mit dir.
Do kimmt – d'Mitz' d'Engel singa hert –
da Oberlehra hoam von Kria.
Boid er d'große Liab' ihr schwert!

On Heirat wor gor net zum denga,
absolut nix hob'm g'hobt de zwee:
Koa Haus, koan Post'n, a koa Hoffnung,
de Aussicht'n wor'n gor net sche.
D'Finitat' – a Witfrau iatzt –
ihr hob't's bei da Oawat g'hoifa,
sie hot fir eng des, wos's es brauchts:
a kloas Haus zum Untaschloifa.

Zu Pfingsten nenzehnsiemavierz'g,
hobt's endgüti es eng g'fund'n,
do hot da Schinkmann-Pforra eng
'traut und ehelich vobund'n.
Und donn is's gonga Schlo auf Schlo:
Z'erscht hob' i mi g'möd't zur Stö',
deen Mo hob'm's in da Schui' ong'stöt,
und a da Walter kimmt donn schnö.

Gonz longsom beriauf is's 'gonga.
n'iadn Kreiza hobt's z'somm'g'sport.
An Luxus hätt's eng nia net g'leist',
sowos wor net enga Ort.
Boid hobt's donn von Hausbau'n 'tramt.
In Baugrund hobt's von Windisch 'kaft,

donn grund'grob'm und Beton ong'mischt
und boid wor da Kolla g'schafft!

Ziag'Ischupfa, Meutariahrn,
longsom wochst in d'Heh' des Haus.
Daneb'm – host g'moat – zu de zwee Buim
gang' si a no a Menschal aus!
Dee Wunsch is in Erfüllung 'gonga,
des Mensch'l sitzt – wo is's? – durt ent,
nur hot's hoit an Buimanoma,
de Liesl ma heet Ewald nennt!

Is Haus is firti wor'n und ee'zog'n,
san, mir finfe, volla Freid',
durt und do hobt's no wos eeg'richt't,
des wor fir eng a schene Zeit.
Und donn san a no on'g'schofft wor'n:
A Finf-Personen-Motorrolla,
a Flockal, donn a Woschmaschin',
und a Küh'schronk, gonz a tolla.

Und domois seid's a monixmoi
om Krito und auf an Beu
bis um eufe tonz'n 'gonga,
do wor da Voda a net feu!
Und donn – es wor a Leichtsinn fost –
hobt's kaft an Käfer vom VauWe.
Da erschte eig'ne PKW,
mir hom olle gschravian „Juche!“

Ausflüg' homma donn gor g'mocht
noch Retz bis auf de Hölzlmüh'
ins Woidviert'l, noch Gutenstein,
und no zu moch'n oner'n Zü.
Dabei san eng're Buima g'wochs'n,
da Reih' noch ins Gymnasium
sans kemma und de Zeit rennt schnö
Matura scho, kam drahst di' um!

Da Voda is daweу Direktor
vo da Hauptschui' wor'n in Retz.
Du woast iatzt a Respektsperson,
des wor fir di koa große Hetz'!
Repräsentier'n wor's deene nia.
Nur dee Dahoam host wirkli g'schätzt:
Host g'strickt und g'naht und a wos bocha
im Gort'n g'häh'It a und g'setzt.

Da nächste Schnitt: 's hob'm deene Buim
is Haus voloss'n noch da Reih'.

Dee Mo wor scho in Pension.

Stü' wird's in Haus und ruiwi glei.

De Buim hob'm g'heirat't, Kina 'kriagt.

Und du host di' recht g'freit mit ea.

Geen hob'm's da donn de Kloan' 'brocht,
glei finfe, sechse zah'n's daher!

Mit da Ruih' wor's do vobei:

Du host as g'wosch'n und vobund'n,
host as g'wickelt, g'fiada, 'trest'.

Zeit fir di' söwa host kam g'funden.

Daneb'm host no in Gort'n g'hobt,
in Weeat a, woast bei de Bee,
fir d'Enkal host no g'strickt und g'häkelt.
Ohne Oawat ko'st net see.

Und a de Enkal, de san groß wor'n,
kemman nimma oft daher.

Dafir is's donn dee Mo recht oid wor'n
und hot a Pfleg' 'braucht, oi'weu mehr.

Und söwa host as a stork gspirt,
is Kreiz losst no, koa Kroft in d'Händ,
es zwickt in d'Fiaß und a im Kopf,
de Kronkat'n neman koan End'.

Unsa liewa Voda is
gonz gach g'storb'm im Finfajohr.

Latzt woast du miad und dir wor schwa.

Du host gspirt, du bist alloo.

Dee Buk'l, der wird oi'weu schlechta,
's gonze Leb'm dir moxmoi reicht.

Im Haus san d'Ilse und da Ewald,
des hüft, mocht's owa a net leicht.

Gonz zum Schluss sog' i dir Donksche
fir ois wos d' g'leist't in oana Tour,
fir deene Buima, d'Schwiegatechta,
fir de nen Enkaln und vier Ur-.

Donksche', dass'd unsan Vodan 'pflegt host
(vorher deen eigan Vodan a).

Donk fir ois, wos mir vogess'n,
wia wonn's gor nia g'wes'n wa'.

Latzt sitzt' do, mit neuzig Jahrln

dee Bukl, der is hoit aso.

Loss di' net untakriag'n Muida,

weu wos Sches gibt's 'n iad'n To!
Bleib aktiv, fohr mi'n Rollator,
om besten rund ums Ort sogor!
Tui wos in Gort'n, i da Kuch'l
und wir' bittsche hun'at Johr!

6.11.2010